

每週經課朗誦經文(巴克禮台語漢字)2014/09/28

共同經課 - 1 出埃及記二十章一節~四節, 七節~九節, 十二節~二十節

1 上帝吩咐諸個一切的話講：2 「我是耶和華——你的上帝，曾導你對埃及地，對做奴才的家出來的。3 「我以外你毋通有別個上帝。4 「毋通為著家己雕刻偶像，不論天頂、地上，及地下、水內所有的物攏毋通做 in 的像。7 「毋通濫稱耶和華——你的上帝的名；因為濫稱伊的名的人，耶和華的確無掠伊做無罪。8 「著記得安息日，守伊做聖。9 六日內應該著磨做你一切的工，12 「著孝敬你的老父你的老母，互你的日子佇耶和華——你的上帝所賞賜你的地得著久長。13 「毋通害死人。14 「毋通行姦淫。15 「毋通偷提。16 「毋通做假的干證陷害你的厝邊。17 「毋通貪你的厝邊的厝；也毋通貪你的厝邊的某、奴僕、奴婢、牛、驢，以及你的厝邊一切所有的。」18 眾百姓看見雷鳴，閃爍、哨角的聲、閣山頂出煙，百姓一下看見就愕愕，遠遠倚，19 對摩西講：「求你及阮講，阮欲聽；毋通上帝及阮講，驚了阮會死。」20 摩西對百姓講：「毋免驚；因為上帝降臨是欲試驗恁，閣互恁時常敬畏伊，免得恁犯罪。」

共同經課 - 2 詩篇十九篇

1 [大衛的詩，交互樂官。] 諸個天講起上帝的榮光；穹蒼報揚伊的手所做的。2 此日對彼日發出言語；此暝對彼暝傳出知識。3 無言無語，in 的聲無通聽見。4 in 的準繩遍佇天下，in 的言語到佇地極。上帝佇 in 中間為著日頭安置帳房；5 日頭親像新子婿出伊的房，亦親像猛勇的人歡喜走伊的路。6 伊對天的此旁出，蹠到天的彼旁，無一項物園密，無得著伊的熱氣。7 耶和華的律法齊全，會互人的心神活起來；耶和華的干證確實，會互人有智慧。8 耶和華的教示正直，會互人的心歡喜；耶和華的命令清潔，會互人的目矚光明。9 敬畏耶和華的道理是清氣，永遠存在；耶和華的判斷真實，一概是公義 10 ——比金，比多多好金卡通欣慕；比蜜，比蜂房滴落來的蜜卡甜。11 閣你的奴僕對諸個受警戒，守諸個有大賞賜。12 是誰會知伊的失錯啊？求你除去我暗靜的過失。13 求你阻止你的奴僕無故意犯罪，毋准彼個罪惡管轄我，我就完全，免犯大罪。14 耶和華——我的石磐，救贖我的主啊，願我的嘴所講的、心所想的佇你的面前得著接納。

共同經課 - 3 腓立比書三章四 b 節~十四節

4 若別人掠做有通倚靠肉體，我就閣卡有。5 我第八日受割禮；是以色列族的人、便雅憫的支派，是希伯來人所生的希伯來人。照律法，就是法利賽人；6 照熱心，就是窘逐教會；照佇律法的義，就是無縫通嫌。7 若是平素做我的利益的，我為著基督已經看伊做損害。8 毋若按呢，我真正看萬事做損害，因為我掠識我的主基督耶穌做第一好。我為著伊曾損失一切，也看做糞埤，是愛得著基督；9 來長長惦佇伊，毋是有家己的義出佇律法的，就是有對信基督的義，上帝為著信所賞賜的，10 互我識伊，及伊復活的權能，以及有份伊的受苦，來學伊的死，11 看會得通到佇彼個對死人中的復活。12 毋是講我已經得著，抑是已經完全；獨獨走進前，看會通得著基督耶穌的所以得著我的。13 兄弟啊，我無掠家己做已經得著，獨獨專務一項，就是袂記得後面的事，致意頭前的事，14 向所插的標來走，到得著上帝佇基督耶穌對頂面召咱的賞。

共同經課 - 4 馬太福音二十一章三十三節~四十六節

33 「閣聽一個譬喻：有一個家主栽一園葡萄，用籬笆圍伊，內面開酒窟，起一個守更樓租互佃戶，就去別所在。34 收果子時欲到，就差伊的奴僕就近佃戶收伊的果子。35 佃戶掠伊的奴僕，一個拍，一個劊，一個用石頭擲。36 閣差別個奴僕，比前卡多；in 猶原按呢款待 in。37 後來差伊的子就近 in，想講：『in 欲尊敬我的子。』38 若是佃戶看見彼個子，就相及講：『此個是伊的後嗣。來，給伊劊死，通得伊的業。』39 就掠伊，摔伊出園外，害死伊。40 今園主若到欲怎樣來辦諸個佃戶？」41 in 給伊講：「伊欲用惡報來滅諸個惡人，將葡萄園租別個佃戶，就是照時納果子的。」42 耶穌對 in 講：「經裡所記載：師傅所棄揀的石成做厝角頭的石。這是主所成的，咱的目矚看做奇怪。恁豈未讀嗎？43 所以我給恁講，上帝的國欲對恁搶去，來賞賜結伊的果子的百姓。44 閣跋倒佇此塊石頂的，啲欲破糊糊；互此塊石壓佇伊頂面的，欲幼末末。」45 諸個祭司頭及法利賽人聽見伊的譬喻，知伊所講的是指 in。46 就愛欲掠伊，若是驚眾人，因為眾人掠伊做先知。